

Апостол 29.09.2024

Б: Мир всем.

Я: И духови твоему.

Б: Премудрость.

Я: Прокимен глас 7:

Возносите Господа Бога нашего / и поклоняйтесь
подножию ногу Его, яко свято есть.

Хор: Возносите Господа Бога нашего

Я: Господь воцарися, да гневаются людие.

Хор: Возносите Господа Бога нашего

Я: Ин Прокимен, глас 4:

Я: Дивен Бог во святых Своих, Бог Израилев.

Хор: Дивен Бог во святых Своих, Бог Израилев.

Б: Премудрость.

Я: к галатом послание святого Апостола Павла чтение.

Б: Вонмем

Братие, уведевше яко не оправдится человек от дел закона, но токмо верою Иисус Христовою, и мы во Христа Иисуса веровахом, да оправдимся от веры Христовы, а не от дел закона, зане не оправдится от дел закона всяка плоть. Аще ли, ищуще оправдятся о Христе, обретохомся и сами грешницы, Христос убо греху ли служитель? Да не будет. Аще бо, яже разорих,

сия паки созидаю, преступника себе представляю. Аз бо законом закону умрох, да Богови жив буду. Христови сраспяхся. Живу же не ктому аз, но живет во мне Христос. А еже ныне живу во плоти, верою живу Сына Божия, возлюбившаго мене и предавшаго Себе по мне.
***(Гал 2:16–20, зач. 203)**

Братие, извествуяй нас с вами во Христа и помазавый нас Бог, Иже и запечатле нас, и даде обручение Духа в сердца наша. Аз же свидетеля Бога призываю на мою душу, яко щадя вас, ктому не приидох в Коринф, не яко обладаем верою вашею, но яко споспешницы есмы вашей радости: верою бо стоите. Судих же в себе сие, не паки скорбию к вам приити. Аще бо аз скорбь творю вам, то кто есть веселяяй мя, точною приемляй скорбь от мене? И писах вам сие истое, да не пришед скорбь на скорбь приму, о нихже подобаше ми радоватися, надеяся на вся вы, яко моя радость всех вас есть. От печали бо многия и туги сердца написах вам многими слезами, не яко да оскорбитесь, но любовь да познаете, юже имам изобильно к вам.

***(2 Кор 1:21–2:4, зач. 170)**

Братие, поспешствующе молим, не вотще благодать Божию прияти вам. Глаголет бо: во время приятно послушах тебе, и в день спасения помогах ти. Се ныне время благоприятно, се ныне день спасения. Ни едино ни в чемже дающе претыкание, да служение безпорочно будет, но во всем представляюще себе якоже Божия слуги, в терпении мнозе, в скорбех, в бедах, в теснотах, в ранах, в темницах, в нестроениях, в трудех, во бдениих, в пощениих, во очищении, в разуме, в долготерпении, в благости, в Дусе Святе, в любви нелицемерне, в словеси истины, в силе Божией, оружии правды десными и шуими, славою и безчестием, гаждением и благохвалением, яко лестцы, и истинни, яко незнаеми, и познаваеми, яко умирающе, и се живи есмы, яко наказуеми, а не умерщвляеми, яко скорбяще, присно же радующеся, яко нищи, а многи богатяще, яко ничтоже имуще, а вся содержаще.

***(2 Кор 6:1–10 зач. 181)**

Б: Мир ти.

Я: И духови твоему.

Б: Премудрость.

Я: Аллилуиа глас 1

Я: Помяни сонм Твой, егоже стяжал еси исперва.

Хор: Аллилуиа 3 раза

Я: Бог же, Царь наш прежде века, содела спасение посреде земли.

Хор: Аллилуиа 3 раза

Я: Терпя, потерпех Гóспода, и внят ми, и услýша молýтву мою.

Хор: Аллилуиа 3 раза